



Spoznaja Allaha (Medina)

Hatib: dr. Abdulbari ibn Avad es-Subejti

21. džumadel-uhra 1447. po Hidžri / 12. decembar 2025.

Hvala Allahu, Uzvišenom u Svojoj veličanstvenosti i u Svojoj vlasti; Onome Čiju su veličinu posvjedočila sva stvorenja. Njega hvalimo, slavljem neka je, hvalom koja ispunjava horizonte snažnim odjekom i dopire do dubina svojom svjetlošću i blještavilom, i zahvaljujemo Mu zahvalnošću roba koji je spoznao svoga Gospodara pa Mu se pokorio, razmišljao o Njegovim blagodatima pa Mu se poklonio, i posvjedočio tragove Njegove dobrote pa se ponizio pred Njim.

Svjedočim da nema drugog boga osim Allaha, Jedinog, Koji nema sudruga, spoznali smo Ga kroz znamenja pred kojima se duše ponizuju, i kroz stvorenja koja svakoga jutro i večeri govore o Njegovoj moći, i svjedočim da je naš prvak i naš vjerovjesnik Muhammed, sallallahu alejhi ve sellem, Njegov rob i poslanik, onaj čijom su poslanicom obasjani putevi upućenih. Allahu, podari njemu, njegovoj porodici i ashabima, svjetionicima u tami, i svima koji slijede njihov put, Svoju milost, spas i blagoslov.

Savjetujem sebi i vama bogobožnost prema Allahu, jer je to najpotpunija opskrba koja popravlja srca i usmjerava korake.

U svakom srcu postoji čežnja koja se ne smiruje i tihi upit koji se vraća svaki put kad čovjek ostane sam sa sobom: Jesi li spoznao Allaha? Jesi li Ga istinski spoznao? A Kur'an je pred nama, prepun ajeta koji nas upoznaju s Allahom: On je Allah... On je Allah... On je Allah...

On je Allah Veliki, a Njegova se veličina očituje u ovom prostranom svemiru: u nebesima podignutim bez stubova, u zvijezdama koje se kreću precizno određenim putanjama, u postojanim planinama, koje čuvaju ravnotežu Zemlje, u morima koja nose tajne moći pred kojima razum zastaje, u smjeni noći i dana, u rađanju života iz





kapi sjemena, u savršenom poretku Sunca i Mjeseca: “svako se kreće do roka određenog” (Er-Ra’d, 2), da bi sve stvoreno posvjedočilo da iza ovog preciznog poretka stoji Gospodar Veličanstveni, Kojeg pogledi ne mogu obuhvatiti, a On obuhvata sve poglede.

On upravlja svim stvarima savršenom mudrošću: nijedan otkucaj srca ne biva bez Njegove dozvole, nijedan list ne padne a da On za njega ne zna, nijedna kap kiše ne spusti se bez Njegove naredbe, nijedan se korak ne napravi bez Njegove odredbe, niti ijedna briga stegne tvoja prsa a da On o tome nema znanje.

On je Allah, Milostivi, Koji kaže: “Moja milost obuhvata sve” (El-A’raf, 156). Razmisli dobro o tome – sve. Njegova milost obuhvata onoga ko griješi prema Njemu, onoga ko Ga ne poznaje, pa čak i onoga ko Ga poriče, pa šta je tek s onim ko Mu je pokoran i ko Ga voli?! Njegova milost nije samo u darivanju, već i u iskušenju: koliko je bolesti približilo tvoje srce Allahu, koliko je gubitaka koji su te podsjetili na prolaznost dunjaluka, koliko je briga koje su te “natjerale” da padneš na sedždu i postale razlog skrivene milosti... Poslanik, sallallahu alejhi ve sellem, kada je vidio majku kako u strahu i nježnosti grli svoje dijete, rekao je: “Allah je prema Svojim robovima milostiviji nego ova majka prema svom djetetu.” (Muttefekun alejhi)

On je Allah, Zaštitnik, Čija te zaštita ne napušta nijednog trenutka: čuva te noću i danju, na putu i kod kuće, u tvom srcu i tvom tijelu, u tvom imetku i tvojoj porodici, čak i u tvom imanu (vjerovanju), koji je tvoja najveća blagodät. Uzvišeni Allah kaže: “Ali, Allah je najbolji čuvar i On je najmilostiviji!” (Jusuf, 64)

Koliko je zla, koje samo što te nije zadesilo, pa ga je Allah otklonio! Koliko je opasnosti koje su ti se približile, pa ih je Allah udaljio! Koliko je iskušenja bilo zapisano, pa ih je On uklonio zbog suze, dove ili sadake, kojoj nisi pridavao posebnu pažnju!

On je Allah, Onaj Koji je blizu Svojim robovima, i Koji se odaziva, On te čuje kada Mu se povjeravaš.





On je Onaj Koji je blizu Svojim robovima, i nisu Mu potrebni posrednici, ni zakazani termini, ni vrata na koja se kuca, dovoljno je da, u srcu, prošaptaš Njegovo ime, pa da te čuje, i da zna tvoju potrebu, i prije nego što je izgovoriš. Koliko si Ga puta dozvao u trenutku slabosti, pa si osjetio Njegov odgovor (uslišenje) u svom srcu, prije nego na jeziku!

A postoji i velika tajna blizine i bliskosti: Allah voli da vidi kako Mu se utječeš, voli da Mu izneseš svoju brigu i ispričaš Mu svoju tugu. Pa čak i ako se uslišenje odgodi, znaj da je u tom odgađanju skrivena blagost, koju razum ne može obuhvatiti. On kaže: “Pozovite Me i zamolite, Ja ću vam se odazvati!” (Gafir, 60). A šta i trebaš učiniti? Samo iskreno podići ruke i otvoriti srce, jer tvoj Gospodar ne odbija onoga ko Ga moli, ne razočarava onoga ko se od Njega nada i ne zatvara vrata pred robom koji Mu se iskreno obrati.

On je Allah, Onaj Koji mnogo prašta, Milostivi, raduje se pokajanju Svoga roba. Ko smo mi bez Njegovog oprosta?! Kada bi nas obračunavao za svaki grijeh, posrtaj i pogrešku, ne bismo opstali na Zemlji. Ali On je Onaj Koji mnogo prašta, i Koji loša djela pretvara u dobra, Blagi, Koji ne žuri s kaznom, Onaj Koji pokriva sramote Svojih robova. On kaže: “Reci: ‘O robovi Moji koji ste se prema sebi ogriješili, ne gubite nadu u Allahovu milost!’” (Ez-Zumer, 53). Jedna riječ Njegove milosti briše godine grijeha, a jedna iskrena suza briše stranice prijestupa. Pa kakav je to samo Bog Koji voli pokajnike! Kakav je to samo Gospodar Koji prašta grijeh, a zatim se raduje povratku Svoga roba u Svoje okrilje!

On je Allah, Onaj Koji je pun ljubavi i Plemeniti, On obilno daruje i ne prigovara. Kada Allah zavoli roba, obaspe ga Svojim darovima, daje mu opskrbu bez mjere, spušta u njegovo srce smirenost bez vidljivog razloga, ispuni mu srce svjetlom. On je pun ljubavi koju ti daje dok Ga zaboravljaš, odgađa kaznu dok si Mu nepokoran, čini ti dobro dok prema Njemu griješiš. On je Plemeniti Koji ti daje prije nego što zatražiš i čini dobro prije nego što uradiš. Razmisli koliko ti daruje svakog dana: da se probudiš siguran, da dišeš bez bola, da imaš zalogaj koji te hrani i vodu koja te poji, da se tvoje srce smiri nakon brige.





On je Allah, Mudri i Sveznajući, upravlja s mudrošću koju razum ne može u potpunosti dokučiti. Koliko si puta mislio da je nešto zlo, a ispostavilo se da je dobro! Koliko je snova čije je ostvarenje odgođeno, pa se pokazalo da je odgoda bila zbog većeg dobra! Koliko je puta čovjeku uskraćeno nešto što je njemu izgledalo kao gubitak, a u biti je bilo zaštita i skrivena milost! Uzvišeni Allah kaže: "Ne volite nešto, a ono može biti dobro za vas." (El-Bekara, 216)

Svako kašnjenje u opskrbi, svako skretanje s puta, svaka promjena u tvom hodu šapuće tvom srcu da vlast pripada Allahu, i da ćeš, ako budeš zadovoljan Njegovom mudrošću i odredbom, vidjeti dobra koja će te zadiviti.

Allah je Neovisni, a kada spoznaš da je Allah Neovisni, nestaje tvoja potreba za stvorenjima. Ne vežeš se ni za koga osim za Njega, niti iščekuješ dar ili nagradu od ljudi. On je Onaj Koji te čini neovisnim, zadovoljnim, skromnim i bliskim Njemu. Nekada ti otvori vrata obilne opskrbe, a nekada je zadrži i daje ti bogatstvo u duši, a i jedno i drugo je dar. Koliko je siromaha čije je srce zadovoljno i neovisno, dovoljan im je Allah! Žive u smirenosti kakvu mnogi bogataši ne poznaju. A koliko je imućnih čija su srca gladna ljubavi i žedna smiraja! Pravo bogatstvo je da Allah bude u tvom srcu.

On je Uputitelj, vraća te Sebi kada zalutaš, uzima te za ruku kada se tvoji koraci rasprše, i vraća te na pravi put, pa makar tvoje udaljavanje dugo trajalo.

Ovo je Allah, pa onaj ko zavoli svoga Gospodara i obožava Ga, iako Ga ne vidi, njegovo srce čezne za susretom s Njim. To je susret koji duše i srca, s nestrpljenjem, iščekuju od trenutka kada su stvorene. U Džennetu su rijeke, plodovi i dvorci koji ne prolaze, ali iznad svega toga je užitak koji se ne može ni sa čim uporediti – gledanje u lice Allaha, Veličanstvenog, stvarno i jasno, kao gledanje u mjesec u noći uštapa. Poslanik, sallallahu alejhi ve sellem, rekao je: "Zaista ćete vidjeti svoga Gospodara kao što vidite mjesec u noći uštapa." (Muttefekun alejhi)

Džennet je blagodat, Allahova blizina je milost, ali Njegovo viđenje je najveća počast i kruna svake blagodati. Zato je dova Poslanika, sallallahu alejhi ve sellem, bila:





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

“Molim Te za slast gledanja u Tvoje lice i čežnju za susretom s Tobom.” To je slast koja briše svaku bol i zbog koje se zaboravlja svaki umor, nakon nje nema užitka koji se traži niti sreće s kojom se može uporediti. Uzvišeni Allah kaže: “Toga dana će neka lica blistava biti, u Gospodara svoga će gledati.” (El-Kijame, 22–23)

Donosite salavate i selame na najbolje Allahovo stvorenje, jer vam je On to naredio u Svojoj Knjizi, rekavši: “Allah i meleki Njegovi blagosilju Vjerovjesnika. O vjernici, blagosiljajte ga i vi i šalžite mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

